

華泉集八

墓誌
行狀
附錄墓表

~16
1034
8



和
門
卷
1024



華泉集卷十五目錄

墓誌

祖考陶菴先生墓小誌

祖妣貞夫人南陽洪氏墓誌

先考大司諫 贈參判府君墓續誌

附原誌 領議政奉朝賀俞拓基撰

先妣 贈貞夫人豐山洪氏墓誌

叔氏參奉府君墓誌

叔嫂海平尹氏墓誌

叔氏教官府君墓誌

從子進士光裕墓誌

Blank space for the inscription of the tombstone.

華泉集卷之十五

墓誌

祖考陶菴先生墓小誌

我王父陶菴先生諱緯字熙卿李氏本牛峯縣人其
 見於譜者自高麗侍中岑城府院君贈三州伯諱公
 靖始焉歷平章事諱子儀判江陵府事諱延宗國子
 典酒諱蒔判軍資監事諱希時典客判書諱得丘判
 宗簿寺事諱周凡七世入我朝有諱吉培以循良著
 官黃海道觀察使生諱圻司憲府監察生諱承健戶
 曹參判燕山時以玉署長上劄切諫卒被泉壤禍後



贈禮曹判書生諱諶掌隸院司議 贈吏曹參判生
諱之信弘文館副提學 贈吏曹判書生諱劼 贈
議政府左贊成生諱有謙起布衣直拜邑宰卒官戶
曹參議至行純德矜式士林 贈議政府領議政生
諱翮議政府右議政諡忠憲孝友忠直爲國蓋臣生
諱晚昌進士 贈吏曹判書是爲先生皇考天資仁
孝爲文沉鬱紆餘朝暮且一第不幸蚤世妣貞夫人
閔氏驪陽府院君維重之女同春宋文正公外孫肅
哲仁惠德懿純備世稱女中君子兩弟忠文公鎮厚
文忠公鎮遠咸服其達識先生以 肅宗七年庚申

九月二十八日生五歲而孤仲父歸樂公教課甚勤
內則閔夫人導迪又嚴嘗以織事之積累不息證學
不可間斷以戒先生八歲賦草堂卽事有游魚思碧
海睡鶴夢滄洲之句黎湖朴公弼周嘗曰非塵俗人
語宜其早年勇退也壬午擢謁聖文科被史薦歷官
藝文館檢閱待教奉教侍講院兼說書兼司書文學
兼文學兼弼善輔德司諫院正言獻納司諫司憲府
執義四學漢學教授弘文錄都堂錄吏曹錄皆準點
賜暇湖堂修撰校理應教兵曹吏曹佐郎正郎掌樂
院正校書館校理壬辰陞通政己亥嘉善庚子嘉義

已未資憲諸曹參議大司成同副承旨副提學承文
副提調一爲戶工曹參判刑曹者三禮曹者五吏曹
者八漢城左右尹者五四爲都承旨再爲大提學藝
文提學判尹左右參贊知樞工判爲大司憲者最多
於外北評事水原府使江華留守咸鏡監司兼職則
春秋經筵賓客承文院備邊司掌樂院宗簿寺校書
館社稷署提調江都試才關西暗行御史慶尙道均
田使 山陵都監纂輯廳實錄都廳堂上 世子輔
養官其出而仕者十之一二蓋自庚寅終養疏以後
難進易退大小官職無不辭免至於沁都則地近政

好便養亦不赴人始信其決退而先生林下之志益
固矣及壬寅歸樂公爲匈黨所構瘐卒於獄中葬畢
先生盡室八麟蹄尤肆力於讀書鷄欲鳴輒起誦念
日有課程 英廟卽位之元年乙巳春首被 除命
疏陳歸樂公冤誣尋 命復官遂奉閔夫人還花田
舊廬復上疏辭本兼諸職兼陳從前去就矢心自廢
之由 上屢賜別諭至曰君臣之間豈有一不相面
之理先生趁 國練入城陳所懷首尾數千言皆雪
君誣討國賊之義後數日入侍晝講講畢更申前疏
多所陳勉仍卽退歸戊申逆亂作奔問至城外亂定

又歸尋被凶賊李之時誣引還入城胥 命其所謂
甲午試官云云卽先生乞身歸養之後其言之虛謊
如此卽蒙賜對慰諭於是益有遐邈之意將復入麟
峽先寓驪州丁閔夫人憂返葬龍仁之寒泉先壟仍
定居墓下執喪盡禮終不近薑桂之滋饋奠餘暇引
學者習經書而不汎濫於他書服除有職名輒陳疏
辭前後儒疏請召還大臣儒臣多陳白而乙卯輔養
官亦不進日與諸生講學朝則必先小學夕又講詩
經夕食後又令次第抽誦反復質難朝夕二講外四
書及諸書一依朱子讀書次第周而復始每旬休日

以一句內所讀抽籤各誦而講盡一編則又都講元
講外又各隨其所讀而授之又於朔望有別講所帶
山長諸書院亦定爲學規實心勸講嘗曰靜菴栗谷
我師也又曰吾於栗翁受罔極之恩蓋先生平日嘗
以我東諸先正爲尊慕師法之地而特其資稟氣味
有默契於二先生故云然先生自辛酉有風痺之漸
自甲子語音不通尋常酬答皆以文字代之猶不廢
課講丙寅爲便醫藥議還花田以書告別近鄉知舊
上墓而辭發行至廣州膈痰猝發考終于樂生村舍
實十月二十八日也享年六十七門人從行者數十

人加麻者二百六十餘人鞠還于寒泉舊齋十二月
遵遺意合窆于元配吳夫人墓左卽判書公墓塔前
未向之原後十三年貞夫人南陽洪氏又祔其左制
如品字吳夫人陽谷忠貞公斗寅女無育洪夫人僉
正禹賢女有一男一女濟遠文科大司諫 贈吏曹
參判婿參奉俞彥欽孫男五曰木有文行早夭曰禾
牧使曰耒參奉先生易簣後三年因歸樂公夫人上
言出爲其嗣孫先生實不知也曰來教官曰采卽不
肖以蔭歷承旨今爲參判長房無嗣以二房男光憲
爲後文科今忠州牧使三房四房亦早夭以族人子

光裕光承爲後光裕生員以孝 贈職采二男光文
文科今奎章閣直閣光正亦文科今侍講院文學出
後二房其餘內外諸孫若婿并不錄先生旣歿八路
章甫陳章請建院後四學京外諸儒相繼申請者非
一二而皆不報至 當宁二年壬戌始允之仍其書
社爲院 賜額寒泉采自黃岡歸三月延 恩其翌
年印布文集凡二十五卷先生又嘗抄節朱子語類
刪定栗谷全書而曰宙衡曰四禮便覽曰檢身錄曰
近思尋源曰書社輪誦曰童子朝夕歌曰五先生微
言曰三官記皆先生手所編摩并藏于家其曰尊攘

編曰劄疑之劄疑未及成書諸門人錄平日所講小學近思錄四書諸說又有補遺幾卷未及刊行嗚呼先生道德學問自有百世公議卽小子何敢迷焉而英廟季年 正宗代理之初特舉先生詡之以守道林泉令與故進善金公昌翁不待狀議謚太常用道德博文以正服之之二法而謚先生曰文正嗚呼盛哉此可以知先生也若年譜行狀幸而有門人朴文獻公聖源所述庶幾可徵於後而先輩長德今已亡矣大碑隧表尙稽立言之筆幽堂小誌又未有記實之文則後千百載先生其肯曰予有後乎小子惟是

之懼不揆僭妄謹書先系後承資歷生卒而總結之曰先生清通英粹之資本自近道高明精睿之見不由師承以全體大用之學有繼往開來之功文章有不屑焉至其出處大節先生嘗曰言可用道可行不必局定又曰分義二字壞了天下名節是故每較絮於二者之間雖積忤 君上而未或苟且遷就雖異趣者無貳辭言議則率以辨忠逆斥蕩平爲第一義其見於章疏書牘之間者援據義理明白忠懇當時雖不能盡用其言而畢竟是非之定人謂是先生之力若心性理氣之辨平日正論有足以建天地質鬼

神而非小子末學謏見所敢私留竢後世之朱子云

祖妣貞夫人南陽洪氏墓誌

吾祖考陶菴文正先生元配曰 贈貞夫人海州吳氏繼配曰貞夫人南陽洪氏吳夫人先先生四十七年庚辰卒而葬皇舅 贈判書府君諱晚昌墓前實龍仁之寒泉也先生爲之誌洪夫人後先生十二年戊寅十二月十九日卒翌年春祔焉先生蓋已先位乎中而虛其左夫葬有誌禮也而先生與夫人闕焉先生固不待誌而自章若夫人女士也所抱存者惟采采則死誰知夫人德懿者茲不揆僭妄草先生先

系後承資歷生卒旣又爲夫人誌之曰夫人系出南陽麗太師諱殷說其始祖入本朝代有聞人友菊齋諱敬孫同知成均石壁諱春卿觀察使海峯諱命元亦觀察使文章標望伏一世是生諱處深僉正生諱受濟正郎僉正諱禹賢配淑人青松沈氏某官某女寔夫人考妣也夫人以癸亥六月三日生辛巳入先生之門其明年先生擢謁聖文科歷翰林玉堂吏曹郎 賜暇湖堂大司成副提學諸曹參判則門戶已赫舅矣夫人受 誥命亦有年矣而孝順謹畏常若初來絕無驕侈意先生宜之皇姑閔夫人亦曰吾佳

婦生二男一女一有雋才未及下殤而天先生甚惜之一濟遠文科大司諫 贈吏曹參判卽采先君仁心厚德庇燾我後人女清明雅潔先生愛其類已適參奉俞彥欽早寡毀而卒采兄弟五姊妹七俞參奉系子漢容亦參奉內外曾玄多不記我李先系已具先生小誌嗚呼采後生嘗得於家庭緒論蓋先生早辭榮塗退守林泉日以讀書講道爲樂而遭時不幸不能安於田舍棲遑遷徙東至于麟蹄南至于驪鄉又南至于駒城居寒泉之墳菴夫人惟其所遇而安之實有詩人鷄鳴遺意四方門弟子隨其親疎食客

常數十人朝夕每窘甌石春夏多資官糶而縞衣綦巾亦不改其樂又嘗聞諸門族當俞姑訃至先生哭夫人始哭先生止哭夫人亦止哭不敢以一聲先後於先生叱咤罕及於婢使語音不踰於房闥故聞以內斬斬如朝廷此固先生修齊之化有以致之而亦可見夫人之閨範云嗚呼夫人卒時采年甫十四尙能有一二彷彿者夫人以謙約之容謹柔之德音若不出口身若不勝衣而遇事有定見不爲人所撓雖大耄不自逸日手執繭絲以爲常采季妹爲夫人所鞠愛之若偏於諸孫不肖幼駮或毆之責之夫人笑

呵之曰去矣去矣猶未嘗以聲氣加焉雖一言一事平居未見有拂戾之色蓋其性度之溫仁氣貌之安靜如此嗚呼夫人之德於斯爲盛餘何必細述也謹爲誌以納幽宮

先考大司諫

贈參判府君墓續誌

右先府君墓誌領議政俞文翼公拓基所撰其言務謹嚴寧畧而不華此殆古作家體段可以爲先府君實錄卽小子何贅焉惟後子孫生長科宦不敢不追錄茲并記先府君事行氣貌一二以寓羹墻之慕嗚呼痛哉不肖八歲而孤惟府君德器之豐盈性度之

沉深尙有以畧綽髣髴焉者至其慈仁和厚之資恬靜儉約之操詩禮得之家傳孝友本於天賦而軒號曰弘卽文正先生所命也自少富有文學聲望藉甚一世而府君冲淡謹慎持身如處子蔚然有法家遺範是宜天假之年以大厥施以昌我家邦而卒之未究其所蘊者何哉蓋自丙寅山頽先君常含哀茹恨如不欲生嗚呼尙忍言之哉先生自辛酉患風痺至是歲漸益沉綴服李道吉藥始有驗李內醫也欲再致而無路故遂有就近之議將搬歸花田行計旣決發書告近鄉知舊臨發又上墓辭時門人從行者數

十人當日再中夫豈傍觀之所能逆料而雖先生與先君亦何嘗慮及于此哉彼媚嫉者一二祭告之文出而謙齋朴公大齋俞公諸丈莫不駭惋而斥絕之然先君猶隱痛在心雖制闕之後無意榮塗凡有不平一寓於酒引滿取醉常曰處江湖隨分飲啄是吾志也日侍大夫人側怡愉爲樂間有除命或暫出卽還餘皆不就畢竟壽不及中身位不能滿德而止嗚呼天乎府君早颺明廷世所稱清宦華職無不歷遍年未服政秩已緋玉矣則不可謂不得於人而獨奈何不能於天如此哉雖然小子幸賴先庠年至七

十方參判戶曹其 贈先府君爲嘉善大夫吏曹參判弘文館提學先妣爲貞夫人以采嘗尹東京也禾之子光憲采之子光文光正皆文科今爲都正承旨文學內外子孫總百餘人是皆先府君不食之報歐陽子之言曰雖不克有於其躬足以庇賴其子孫者益信然然則雖遲速有時謂府君得於天亦宜哉府君嘗爲徐掌令洪將軍立碑外先柳參奉諱寅仝墓無後荒頽在花榭後岡殆不辨塋域府君自爲文豎石而記之其篤於追遠誠於爲善又如此云禾後爲牧使來爲教官未笄之女歸金致廣光憲入主宗事

故牧使以光正子之女朴星壽參奉與教官取打愚
之後崧之子光裕光承爲嗣教官二女趙吉喆前監
察俞常柱縣令采之三女進士黃基瓚朴齊賢金炳
珪徐翼修一子有穀金健柱前縣令老職僉樞三子
魯善魯頌魯鍾縣令金斗南無育南一耆進士一子
宗獻一女宋鼎來趙秉鎮系子瀟鄭元綏二子世祐
進士世禎一女洪樂宣監役金致廣亦一子曾玄以
下不盡記不肖男采謹書

附原誌 領議政奉朝賀俞拓基撰

牛峯李氏高麗侍中公靖之後入我朝簪組相望

至諱有謙戶曹參議生諱翮右議政生諱晚昌成
均進士生諱緯左參贊學者稱陶庵先生聘南陽
洪氏僉正禹賢女舉一男諱濟遠字毅甫幼而豐
盈沉深患痘濱危陶菴公夢老人謂勿憂也兒必
貴而多福果卽甦少長文詞蔚然丙辰擢謁聖文
科拜藝文館檢閱嘗夜對宣醞 上教曰聞李某
之父以閔氏外孫善飲酒某亦必善飲仍命連酌
對以父命無過三杯則 上曰君命亦重爾父聞
之必不責 命連飲六七杯實異數也已而陞六
品選都堂吏曹錄拜副校理兼司書帶三字銜別

兼春秋除北評事掌試以公北人咸稱前後一爲副修撰修撰掌令兼校書校理中學教授再爲副校理校理吏曹正郎七爲獻納差沃川按覈御史俱不就一拜京畿都事兼文學輔德軍資監正癸亥爲養除黔川縣監邑有高麗忠臣徐掌令甄墓而蕪沒無標識乃請陶菴文刻石而躬祭之又令士民子弟自八歲十五能讀小大學者錄其名曰講生月朔賞罰以勸懲之殆一年頗有作興之望乙丑除安城郡守立殉義碑于壬辰義兵將洪季男戰壘以表之做栗谷先生舊制損益成學規遍

諭一境俾行之是冬擢水原府使陞通政階尋罷還蓋爲政寬而確有犯者不饒奸猾自戢大小國役官自拮据不使民知之吏民久而猶懷丙寅丁陶庵憂制閔連除判決事大司諫承旨兵曹參知俱辭一拜兵曹戶曹參議嘗以大司諫上章言壬獄之慘尙忍言哉其誣逼之計不止於戕殺諸臣是以 聖上曾若曰此卽戊申嚆矢大逾張本載籍以來所無者 聖教旣如是明白嚴正則鍛鍊此獄者宜卽勘正而削勳燒案之後一番懲罪卽不可已者目今義理不明國綱朝象可憂非一正

名立紀莫先於此也不報掌令任師夏言諫長此論其義則正其言則是豈可忽棄而莫之省納也相臣諉以大駕幸溫時兩司不備請罷在外者上又下嚴旨并師夏特罷之玉堂陳劄請寢亦不聽壬申正月二十六日卒享年四十四始葬水原再遷而永窆于龍仁寒泉夫人豐山洪氏同知敦寧府事重福之女舉五男七女男長木天次禾縣監次耒出爲從曾祖判書公後錄仕爲參奉亦天次來次采女適徐翼修金健桂金斗南南一考趙秉鎮鄭元綏一未笄侯事父母未嘗違其意爲親

瘠屢入山治藥法宜齊潔當祁寒亦必澡浴只一妹友之深旣沒語及之必泫臉雅素儉約不治鞍馬衣服待窮族曲有恩義一毫無求於人奉母夫人就居高陽舊墅猶不忍離側從宦暫入卽歸歸則怡愉昕夕備養志物常曰幸賴祖先德蔭幼穉滿前眇福實深兢懼今何可有志進取以招損也案有一部小學誠諸子曰此是吾家法門吾先子每朝必講是書今不宜廢前規日起晨謁廟後輒令諸子侍讀數板噫侯早承詩禮教嘗有文藝妙歲發朝聲望出人名塗華貫敷歷殆遍使之天假

以年則乃公乃卿庶幾乎匡翼世道而秩纔緋玉
壽不及中身嗚呼此曷故焉無或嗇於今者將收
報於他日歟銘曰

幼服庭訓藉甚士友早躡雲路望傾朝右具茲衆
美佇必大受而遽止斯寔命不偶豈其遺羸歸成
在後銘于幽隧昭示永久

先妣 贈貞夫人豐山洪氏墓誌

先妣淑夫人洪氏豐山大姓自麗朝直學士諱之慶
累傳至大司憲慕堂諱履祥以經術益著再傳而有
諱柱元永安尉文懿公諱萬容判書貞簡公諱重福

同知敦寧府事寔夫人以上三世大司憲趙公泰東
外祖也夫人生而孝順及長敏達穎慧同敦公營城
南新第母夫人適病甚夫人能左右之代幹百須父
母益奇愛之年十七歸于我先府君府君之父曰陶
庵先生壬寅先生遭仲父歸樂公士禍盡室寓麟峽
夫人生長綺紈一無簪珥之態蔬食矮屋處之夷然
也恪修婦道德容咸備祖姑閔太夫人皇姑洪夫人
甚嘉重之未幾夫人連舉丈夫子先生曰吾家本孤
族三政丞十及第換一男不得乃今日有此喜耶始
夫人無小字同敦公乃命之某日爾有福有德此吾

所以肇錫汝也夫人聰明過人事一經耳終身不忘作書札辭簡而理達片言能盡人所欲言凡女工各臻其妙而亦不自多也諸子有過終日不與言或課讀不勤痛被楚撻每誦閔太夫人語而戒之曰有子不學不如無子先生常舉似於人而稱之夫人事舅姑一意順適見人窮急周恤如不及族人有過時未娶者先生爲周章之以資裝憂夫人卽以綵幣奉獻後其子未婚又爲之力辦而送之壬申先府君棄世夫人哀毀如不欲生已而曰我則死誰使上奉下鞠於是供養教育極其孝慈勉諸子常曰取人不端必

以誤身未亡人所以爲生者惟願若等讀書飭行無忝所生耳客至非其人則愀然曰與此輩遊何益每良宵月明令不肖兄弟誦竹枝詞襄陽歌詩傳小學等書親黨有請見者命不肖輩侍坐然後延之人有勞於我來必眷待之死必愍悼之雖奴隸之賤見其能孝友者必嘉賞不置待人仁恕而無過情之語於諸婦不遽加辭氣但以意示之而已御婢僕寬而不苛梱以內無怨言蓋其資性惠哲儀貌秀潔持心以和順治身以恭儉膳羞菲薄服用簡素嫁女不過備枕衾衣裳一切紛華浮夸之習不屑如也老來喜着

短布裳曰非乏也聊以便坐臥也以丁亥八月廿七日生癸未八月六日卒享年僅五十七嗚呼痛哉初府君墓自水原遷于廣州是年又遷奉于龍仁之寒泉南麓至是祔焉甲申四月不肖男采謹書

先夫人捐背之翌年采撰次夫人事行一通爲家狀自以弱冠蔑裂未滿意棄之後五十一年甲戌始留意爲傳後之圖則昔之所耳目殆無一二記存者遂於舊篋中得此本乃敢約其文用成幽堂之誌而我李先系後承已具載先府君原誌後記茲不贅其 贈先府君吏曹參判先妣貞夫人以

采推恩也采今參判諸孫顯者光憲光文光正皆文科後先敷歷庶幾不墜我家聲竊嘗思之夫人德懿蓋不可勝書而卽其爲女爲婦爲母靡有不盡分焉者髣髴我閔太夫人是知餘慶所及以至于今日休不獨先先生先府君遺教是資爾後有秉形管者作心不易斯言也嗚呼采又書

叔氏參奉府君墓誌

先府君大司諫 贈吏曹參判諱濟遠王考文正公陶菴先生諱緯系出高麗侍中岑城府院君諱公靖我李以岑城爲貫自此始吾兄弟五人公序居三諱

未字仲益其始生也先生仲父忠肅公夢先生而與之鼎是故小字曰鼎賚及長卒後忠肅然先生之歿已三年矣先生不知也忠肅諱晚成吏曹判書 贈議政府左贊成其所後考妣曰孝子 贈持平諱翎烈女同福吳氏其子曰正郎練以孝 贈執義一門三孝烈綽楔并美忠肅亦為國殉身得諡曰忠雖不旌猶旌也一何其躋哉初正郎無子忠肅夫人金氏與正郎配鄭氏議立後取族人子命彬為子仍以公嗣之以尸忠肅之祀公自是日必謁廟退而事兩世王母務盡其歡其奉先也籩豆有楚禮儀整肅親戚

鄉黨相賀曰忠肅有孫矣公生而聰穎雋逸早承詩禮之訓蚤夜課誦文詞夙就先生嘗詠梅而贈之曰含英莫早發公將以常日也遂扁其齋曰含英出而遊泮庠已屈曹偶人謂朝暮且一第咸推以公孤之器而公遽病矣以丙子閏九月六月卒嘗一拜 明寢郎不就距其生癸丑僅二十四年公配尹氏有遺腹而亦女也至是而忠肅之嗣又絕豈所謂天道無知耶時金夫人鄭淑人尚在堂嗚呼益可悲也先是公盡室出郊讀書課農修治歸樂舊堂堂忠肅所為號者庭畔有葡萄枯死年久叢葉忽生而蔓而架公

卒尋又枯此何理也御家井井有法蒼頭服役者十數人豐其衣食俾各趨事赴功一如力田之家常於堂前杖而繩之懸其磁器昏曉點出入以考勤慢雖其規模制置倣忠肅緒餘而少年才器亦自可見采幼而孤從公三年學粗解魚魯之辨者公之賜也今老白首獨存畧書其依稀所睹記者以爲公幽堂之誌而其他不能詳惟燁然之容卓爾之資至今在心目間也公始葬寒泉先麓遷而之古梅谷坐子之原皆龍仁也尹恭人校理得敬之女先公一年生以己巳卒與公緬而耐實左方婦德蓋備別有誌系子光

裕進士亦以孝有褒贈之 命其三子曰埴教官曰
璞曰埴於是旣絕之嗣復續天之報施其或在是歟
女適人而早寡其一子亦早幼公之典型噫其亡矣
公卒後五十七年壬申弟原任承政院右承旨采涕
泣而識之

叔嫂海平尹氏墓誌

吾叔氏參奉公諱耒有賢配曰恭人尹氏海平大姓
文科壯元弘文館校理得敬之女其先有領議政文
靖公梧陰諱斗壽判書章翼公諱暉再傳而有參贊
翼正公諱堦判書孝獻公諱世紀於恭人高曾祖也

外祖曰同春宋文正之後郡守堯佐恭人年十五入吾門當是時吾父母大諫公諱濟遠淑夫人豐山洪氏王父母陶菴先生諱緯貞夫人南陽洪氏兩世具慶吾兄弟姊妹斑彩盈室人莫不艷稱未匝紀先生與大諫公捐背吾伯氏叔氏又相繼短折嗚呼盛衰悲歡直一瞬耳於是恭人哻笑相反涕淚爲命至七十八歲而卒何其窮也參奉公旣冠娶之三年出爲先生仲父忠肅公諱晚成之後蓋當恭人之于歸也貞敬夫人金氏見而嘉之曰吾之孫定矣至是果如其言時祖姑鄭淑人亦無恙恭人凡所以事二夫人

者如事吾母氏愛敬咸備以至晨昏之省朝晡之供三十年不懈益虔及喪哭之如哭參奉公方公之喪也恭人指腹而謂其兄弟曰幸而生子也庶幾宗祧有托言已泣下旣失望他無可子則又泣且言曰所以不死者爲親在也爲後系也忍負逝者恭人之弟景晦文東嘗傳道之若此吾先妣嘗詔不肖曰有子當先後若兄不肖涕泣而受命竟不能如其志及光裕後而後光文光正始次第生旣長而成立恭人每自傷曰命也又泫然泣采亦心悲之恭人性重厚罕言笑其退讓甚外若無能而奉先祀以誠御家衆以

恩克勤克儉制事不苟儼然有丈夫幹局喜怒不形
入莫測其涯際采少靡家每入都館於恭人恭人以
夫子之心爲心接應無難色每事必咨議妯娌姊妹
之間亦未有雌黃者顧不賢而能之乎光裕事恭人
有深愛宗黨咸曰孝哉有是子恭人亦曰何必自生
其本生兩親年老家貧無以爲養則恭人輒隨力而
救之事或難處若不聞者以安其心此又閨閣中所
難也生卒在壬子十二月朔日己巳六月二日始葬
花田宅後及公之墓遷乃合祔于古梅谷向午原我
李先系後承已悉公誌不復詳

叔氏教官府君墓誌

我李自高麗侍中三州伯諱公靖始著籍入本朝有
諱吉培黃海道都觀察使代有簪纓至諱有謙以經
術德行起布衣直拜守宰官至戶曹參議 贈領議
政號晚悔是生諱翮右議政諡忠憲是生諱晚昌
贈吏曹判書是生諱緯左參贊文正公陶菴先生於
公爲祖考曰大司諫諱濟遠妣曰淑夫人豐山洪氏
同敦寧重福女有五丈夫子公其第四也諱來字仲
修五六歲先生甚愛之曰惟肖手書以贈之及長風
儀動盪如秋水芙蓉睂宇蒼峻眼彩清澄人比之祥

麟瑞鳳出入泮庠聲名藉甚二十魁合製朝暮且大顯不幸得貞疾晚以陞試舉司馬爲 英陵參奉內侍教官卒時年三十二庚寅四月十二日也其生在已未六月十一日公將降先生夢松間明月故小字曰松貴公亦自號松月菴常謂吾祖百世之師也每遇一事決一議必曰先生先生以早孤爲至痛事母氏欲其喜繞膝作嬰兒戲與人交坦率任真恥世之齷齪爲邊幅者一有所執確乎有不可奪之操而未嘗以小節自拘遇訕亦不懾人有未可意正言不諱邱嫂金恭人自悼其久無可嗣欲以遠宗子子之其

意甚牢家內莫敢言言亦不入公時居廬寒泉貽書以諫辭理嚴正恭人遂大覺曰曉人不當若是耶後從子光憲生而入承宗祀則又喜曰愛我者其惟我四叔乎李相國澱其弟侍郎瀾於元配爲渭陽故視公如女婿時或請公事無不議言無不從公亦待之以誠而至議不合處亦終不肯屈李公愛而憚之平居喜朋知讌話不問家有無命酒相娛風流映發人莫不願爲之交各得歡心庭塢雜蒔花卉左右圖書手一卷清坐吟哦多警發語聰明絕人殆過目成誦尤熟於朱子綱目論古今人成敗事得失歷歷如指

掌初讀易之乾卦凡三回已上口采欲效之卒莫及也嘗語采曰安得結茅山水間與爾聯牆齊簷讀書其中以老也采今退處鄉廬公之子光承亦隨而家焉優游文字間以娛暮境公則不知追思前言益不禁投涕也嗚呼公以先生肖孫孝友根於天賦純正之資清明之氣類非叔季人品若能顯而處巖廊足以匡主而保民就使不能亦可以出膺百里之寄而盡芻牧之責退守一邱之安而述家庭之學顧乃豐畀嗇享官止一命愛物之仁亦未及著於事爲竟不能昌大吾門戶豈非天哉公凡再娶皆南陽洪氏府

使益喆女學生啓涵女各有一女適趙吉喆俞常柱縣令光承以族子爲後有二女幼趙二男鎮文鎮簡三女宋欽樂李儂李憲會俞二男煥中煥采與公兄弟而師友也性器未必盡同然年相近志相合文酒溪山之遊未或不同自以知己於家公之墓松檟已拱而采亦老白首矣俞氏女泣請爲誌曰微季父言之誰知吾父者噫真不媿中郎之女矣采亦爲之泣畧草其所嘗知見以納諸幽晚悔府君以下五世皆墓在寒泉寒泉之東越數岡洞簫之谷壬坐之原高四尺封者是公墓也元配柔嘉惠溫公甚宜之生

于辛酉五月廿七日以已卯九月二十日卒而先葬及公葬穿其右而合焉弟采謹誌

從子進士光裕墓誌

我李自三州伯諱公靖著籍傳十三世世有簪纓至參議 贈領議政晚悔先生諱有謙益大以顯晚悔五子第二曰翎與其配吳氏殉孝烈并旌閭 贈司憲府持平第三曰遺逸大司憲 贈吏曹判書文穆公翔號打愚第四曰右議政忠憲公翮忠憲三子仲曰晚成與辛壬四忠共定策殉國以吏判而 贈左贊成諡忠肅以忠憲之命出爲仲父嗣以上承大司

成諱承寧之後

贈參議恣

贈參判有敬持平公

所後祖若考也忠肅有子曰綵進士壯元正郎以孝卒亦旌 贈無嗣以吾叔氏參奉公未爲其孫有文行早卒而又無嗣嗚呼忠肅以上以下盖屢絕而屢續如是者凡七世此何天也族兄崧以打愚玄孫出爲縣監縑之孫君其子也而入爲吾叔氏後時年十二大司諫 贈吏曹參判諱濟遠左參贊文正公陶菴先生諱緝卽吾父祖兩世而文正於忠憲孫也是故文穆忠憲忠肅文正咸祖於君君名光裕字景垂其日光殷士中是初名與字也君以 英宗辛巳三

月四日生自幼無疾言急步事吾嫂氏尹恭人有深愛及長尤洞屬然非有祭祀賓客不敢須臾離必晨省夜退恭人飯君亦飯恭人寢君亦寢怡聲愉色左右服勤殆三十年如一日恭人性嚴有法度平居少許可屢經險釁有悲無歡而獨於君安之每日吾孝子孝子推其孝以友兄弟以睦宗黨以及於鄰里藹然有仁恕之色賢愚貴賤知君者咸愛重之及喪莫不涕君早登庠若將進以爲世需以不墜忠孝家聲而不幸有橫途遂进出花外舊廬讀書飭躬以爲終老計不有 聖明在上則幾不免矣然猶不怨悔憫

恤其姊務適親意人益以此多君恭人梧陰之後校理得敬之女本生母沈氏進士赫女也君配安東金氏仙源文忠公後孫郡守 贈吏判履仁其父也君年四十歲庚申歿葬于家後枕亥之原歿之日十二月十八也有三子曰埴及忠肅不祧 命錄後爲教官曰璞曰埴皆有承家之望嗚呼葬而誌禮也埴之屬余亦久矣君從余學本末皆吾所知尤安忍無一言然父兄之於子弟宜簡而不宜溢至其爲孝之實朝家有貲贈之 命不待余言而著惟其平日所存世未必盡知其容願而潔其操貞而儉其發言安詳

其處事精簡人見之可知為法家佳子弟蓋其天稟
近道故雖不切切於為學而有諸中而形於外者自
如此古所稱吾必謂之學矣者君有焉是足以不朽
也歟悲夫

華泉集卷之十六目錄

行狀

巴溪處士鄭公師洙行狀

縣監禹公錫珪行狀

學生金公洩行狀

縣監李公挺河行狀

縣監馬公應房行狀

縣監洪公羲綏行狀

華泉集卷之十六

行狀

巴溪處士鄭公行狀

巴溪處士鄭公諱師洙字魯源系出烏川其曰巴溪者以公住金陵之鳳溪故大齋俞公彥鑠爲之號焉鼻祖諱襲明平章事嗣是八代文科世躋卿班諱仁彥典工判書於圃隱先生爲旁曾祖入國朝諱光厚官刑曹判書數世至諱從韶與舅順興守李甫欽謀復莊陵及甫欽敗公亦坐廢然清望甚高佔畢齋於榮川小樓記以鄭先生稱之是生諱以僑兩世皆

文科重試吏曹佐郎始卜居鳳溪其後不絕簪纓至
諱維城自丙丁難後廢舉不應辟諱玄升護軍有孝
行諱震卿生員是公之高祖曾祖諱璞早卒無嗣以
從弟道載之子萬容爲後公其子也妣晉州柳氏縣
監志和之孫同春先生門人也一日夢大虎入室自
言爲其子是歲公果生故小字夢虎云自幼性孝友
惟父母訓是從與兄弟遊終日和湛氣宇軒豁才性
穎拔未學書聞旁人所讀而輒記誦之七歲畧通文
義已能作詩多驚人語有吟老將詩曰老將拔劍步
秋月咄咄恨不滅匈奴鄉老曹公迷命賦雪卽應曰

天上白玉地上來無葉梨花樹樹開曹撫背曰奇才
奇才甫八歲柳孺人溝痘疾及不幸諱其喪使奴擔
負往所生祖母家公號泣曰母氏方有疾而使我遠
去必有故也及到善山則祖母撫而哭之公始覺孺
人之亡而驚倒大哭哭不止聲人莫不感慟出涕三
年之內不與隣兒嬉戲惟逐日課學手不釋卷夜或
達曙不寐父兄憂其勞瘁奪書而藏之然輒竊而讀
之端坐一室不出戶外遂汎濫經史邃文奧義獨自
講究又能透解河洛之書璿璣之數圖式至今尙存
及赴增廣試試題問八陣圖諸生多不記其法就問

華身集 卷一
於公公乃口授手畫歷歷如指掌老宿咸歎曰不謂十六童子能如此聞寒水權先生講道黃江欲與從叔萬源偕往請業竟以冲年未痘不果然及委禽於宋氏之門李諮議顛根卽宋孺人內舅而權先生門下士也相與講論經書李公大異之曰以君英傑之姿高明之見得早遊於吾先生在世時者其成就何可量也每相遇則累日談討不倦公之爲學之功實自此益篤而於一切世間榮利淡然無欲雖以親意黽勉赴舉非其好也嘗戒羣弟曰汝輩有汲汲功名底意未免區區流俗之態立身之初若以非義得之

是先自欺心何以事君是故不以得失介其意丙午參解額赴司馬覆試試題出而適逢前輩私稿因鄉人之請而遂與之其人驚曰善作也何不書呈公笑曰吾年方二十餘矣豈幸人之宿稿而先自欺心哉其人巍捷公則見居然其立心之高可知鄉人至今以爲美談癸丑謁陶菴先生行束脩禮受小學而讀之一言一行無不體察語孟中庸書傳詩傳等書沉潛反復無不讀至千遍尤用力於心經近思錄而於大學則幾至萬遍書社諸書亦輪誦不已蒐輯奧旨輒皆記錄焉先生之南遊也累日陪從西銘太極圖

書集 卷一六
等書質問疑難出人意外先生亟歎之常許以好資
品手書赤心爲已斃而后已八字以遺之曰如吾魯
源者可以聞此又曰開濶中更着縝密寬緩中更着
嚴厲又曰明理以克一己之私虛心以來天下之善
用各當才人各盡情脩齊治平之道由是而立又嘗
呼爲梅花主人前後吟贈多至十餘篇而其一絕有
曰窮冬百卉都歸盡誰似孤姿抵死香辭歸後先生
又有懷詠梅曰時序成功各代遷後期重指歲寒天
自知老醜羞相見且復還君續舊緣卽先生品賞顧
托之意可見公造詣淺深也且先生之纂宙衡也諸

門人蓋費工力而至若學術一篇公之所裒輯多採
用又以鄉射禮廢特命公參証再行於槐壇之下及
歸與洞中長老行飲禮地主李侯華重及其弟尙書
台重聞而嘉之就鳳溪松林中兼行射禮俾公主張
焉屏溪尹公鳳九與遠近章甫行飲禮於螭淵戒公
爲賓禮畢因講心性之說反覆論難多所不合然尹
公亦惓惓不已至於義理邪正之分劈畫爭辨無所
撓奪族弟重謙自言其少時每與某兄論忠逆是非
某兄始必諄諄開導終則辭氣漸厲我亦尙氣務勝
不肯屈服然及退而靜思明日復就而詰之則輒能

打破源頭開示甚切如是者凡數年余乃大悔悟終能歸正今日之爲重謙實某兄之力也嘗於路上見僕夫拾遺而懷之公戒之曰非吾有不可取若利其遺而拾之必將盜人之物而不知愧也其後村人得金鳳釵將欲售之公召而諭曰此寶物也得之者雖喜而失之者甚悶莫如還置故處使失之者還索之設或後得者非其主在汝心無愧矣皆感愧而棄之平生不治產業多至艱乏人或勸以兼治則笑曰是亦學問中一事然一若留心於此則或不無利慾之萌寧失於治產而不可害吾學問是以惡衣惡食不

恥不厭有時寄寓山齋鹽豉不繼而處之晏如也其在白雲菴避痘時每晨興夜寢正衣冠兀然危坐潛玩義易數月如一日雖釋子之勤於其學者自以爲莫及也其季春不幸遘痘昇還鳳溪疾革呼母請吮乳良久曰母乳不生子之食絕矣願父母毋念短命之兒壽考康寧願謂宋孺人曰男子不絕於婦人之手當退出孺人纔出門使侍者正席而卒實丁卯三月十六日距其生甲申十二月二十七日享年纔四十四葬門巖峯馬頂山左麓坐丙之原宋孺人必觀之女有婦德事舅姑以誠奉君子無違生於丁亥後

華身集 卷一六
公五年而歿。祔公塋左而異墳焉。舉二男一女。長穆繼家學。屢登公剡。次穉女適李錫祿。長房男約。光生員有文行。早夭。權烈金必精。金垌其壻也。季未行。側室男女并幼。次房男纘光。斗光奎光一女。幼權婿男正柄。纘光一男。金必精三男皆幼。公爲人忠厚寬仁。清曠恬淡。絕無塵俗氣味。每見古人臨亂殉節善處事變者。輒擊節欽歎其事親也。容色怡愉。定省無闕。朝夕侍飯。必撤而後退。有病則色憂。衣不解帶。夜不就寢。早喪母。至痛在心。每歎曰。人幼而育於父母。長而奉養父母。是人道之當。然而我則慈母之面。幼不

能辨。記三年之喪。幼不能執禮。劬勞之恩。無以報。因掩泣嗚咽。當忌日。思其所嗜。必稟于伯氏而設焉。齊沐肅敬。不踰禮節。事繼母如母。承順其志。終始不懈。母歎曰。吾有子三人。皆不如此子之賢。而孝者也。其寓墳庵也。每朔望。必遍省先墓。輒命子弟隨後。曰。吾家歲一祭。例於齋室廳。事紙牒行祀。及暮忙忙而歸。故後孫雖鬢蒼白者。或不知幾代墓。合窆在某所。幾代墓。單窆在某處。汝其謹識之。又嘗舉似范文正。均是子孫之語。而戒諸族曰。先祖若生。而在此。諸子孫往拜。則其均愛之心。藹然易見。以理推之。生死何間。

子孫血脉不獨先祖之血脉其心亦先祖之心也若有闕墻而傷其心者是傷先祖之心仍誦陶菴先生贈李生胤績詩十世雖遙見則憐之句先生之喪聞訃爲位而慟晨夕輒再拜哭加麻制暮年成服以後朔望焚香拜哭及葬避痘不敢行使弟師沂替往相紼以盡事一之義訓子弟和而嚴或聞鄙倍之言則峻斥而禁之曰爲士者當以誠信爲準何爲此僂悖之言也又曰欲學聖賢先自孝悌始孝者百行之源知事親之道然後可以爲人有姊內外俱沒公撫育其子女稍長勤勤教督有過則流涕撻之兒能感惕

後以明經聞與村秀才日夕講誦雖愚迷難曉者皆令得其旨趣及其亡也無知不知悼惜曰仁人無壽公嘗與貞菴閔公遇洙櫟泉宋公明欽會瓶泉數十日講磨義理酬唱四言之詩閔公書贈弘毅明健四大字曰魯源庶幾近之宋公許以吾儕中益友知菴李公維於書以魯源先生稱之謙齋朴公聖源謂人曰魯源平居不甚異於人觀其退息端坐潛思肅容真有志君子人同里侍直曹公世鵬書以贊之曰魯源平居粥粥若無能爲者而臨事論斷有不可奪之操事親而盡其孝祭先而致其誠以至待人接物表

裏無間而不睹不聞之際益加戒慎之功隱微幽獨之中益加省察之方不安於偏見不急於少成毋自欺謹其獨爲終身符噫觀於此可以知公也采後生雖未及見公而間從諸長老後已聞公篤學且就家庭遺集見先生抵公書有曰烝獻之說不謂銘佩在心逐月程課一一相報不知同座諸友有能如許用力者否蓋先生嘗有烝而獻功之說而公歸輒書報故嘉歎如此余以此益知公勤勵而惜其天不假年終泯泯無聞也及余作宰南方密邇公舊居與公之胤子相往來敘舊然後因得見公所爲日錄者勉齋

所謂真實心地刻苦工夫正爲公準備也胤子屬余以狀德之文余非能重公者何敢言何敢言願以世好責之亦不敢終於辭謹纂次先輩期詡推重之意以俟後之立言者作云

縣監禹公行狀

公諱錫珪字伯玉禹氏貫丹陽麗朝諱仲大諱天錫兩世門下侍中諱偁左代言諱吉生赤城君諱玄寶侍中丹陽伯我朝禮曹判書洪命縣監興輪主簿奠縣監啓江縣監鳳卽公五世以上曾祖諱拜善壬辰白衣倡義錄宣武勲官郡守號月谷享德洞書院祖

諱達海號學圃有行誼文章考諱汝律以孝 命復
戶妣光州盧氏直長壘女公以 仁廟戊子生才器
過人自少講爲學之方以親老黽勉就公車乙卯上
庠壬戌筮仕 昌陵參奉由 宗廟署濟用監奉事
尙瑞院直長司導寺主簿司憲府監察出爲山陰縣
監首行養老禮招延文學討論經旨爲設雇馬廳民
便之已巳罷歸鄉人請以其所殖爲行公曰旣念民
瘼而設寧可無行資不可染指於此遂拂袖而去時
斯文陽九朝象大潰公杜門自守扁其堂曰知足與
弟二人奉養兩親極其愉婉讀書課兒爲終身計庚

午丁外艱歔粥哀毀喪葬一遵文公家禮墓在七十
里外而朔望不廢展省每日鷄鳴輒先候母夫人安
否仍謁廟退不離親側必就寢而後寢撤食而後食
時母夫人年八十餘齒豁公盡力營辦汁魚肉而進
之甘旨無關四時正祭亦未嘗一廢顧其家屢空也
兄弟湛樂同居一室惟書史外未嘗言世間利害鄉
中是非修宗稷置田土爲奉先之資序其事與諸族
相勉依擊蒙要訣作家訓遺子孫每春秋佳節優游
水石間以爲樂甲戌國是始大定諸賢彙進而母夫
人有謝事講學之訓公亦無意於仕乃從遊於判書

歸樂堂李公晚成重尋舊契有論語答問托二子於寒水權先生睡村李相國門下俾知爲己之學倡起多士力主打愚李先生伸冤疏乙酉遭內艱執喪一如前廬墓終制庚寅歸樂李公掌銓以公監鎮川縣勸其出而仕赴官纔三日軍器火乃捐廩而新之便民養老如在山陰時尤加意於學校盡誠勸學李公適巡撫湖西大加稱道曰公可謂不負所舉辛卯罷歸一毫不以取於民癸巳以疾卒距其生六十六配義城金氏是學女有婦道指望月戒其圓虧之常拾秋螢勉其學業之勤蓋公天姿高而其得於內助者

亦多二男洪傳生員洪受俱中生進一女朴海齡命權長房出命集二房出命權四子載梁載正載身載邦命集二子載岳載宅載岳載宅各有一子曰行鎮吉鎮公性孝喪祭一以禮訓子姪以嚴處宗黨以睦居官以廉持身以敬雖平居燕閒之時未嘗側身而倚讀書必窮探其理家素貧未嘗有戚戚容每以樂天安分四字爲平生操履所與遊皆一時名碩如老峯閔公鼎重疎齋李公頤命淡圃洪公受憑癯溪權公尙游并許以南州第一士公之爲人可知已采五世祖晚悔公知大邱府高祖逸休公按嶺節南方多

舊好家然先數舊好必曰禹氏禹氏公蓋世居大邱之花園而嘗受業於逸休公門自謂有事一之義與吾曾王父判書公兄弟爲同研友是故吾王父文正公與公書輒稱尊丈府之東有所謂尙德祠卽逸休公遺愛妥靈之所而尤菴宋文正先生所命名也公欲陞號爲書院歸樂公以書止之曰莫如遵大老之扁寓士林之慕公以是未果如其志然方壬辰改建與近邑同志極力營畫盡意藏修今又改建而公之孫行鎮與幹其役事若有不偶然者矣載岳以采爲逸休公孫見屬爲善狀采何敢辭謹就家狀而撮其

言行如右以備立言者採擇云

學生金公行狀

公諱涖字定卿金氏出商山鼻祖高麗甫尹需有諱韜大將諱湜諱希逸兩世侍中諱文道諱迪諱之行諱玠皆翰林學士諱憫禮部尙書諱元理入我朝以典書召不至觀察使觀道判宗簿寺事洪其子若孫歷數世有察訪彪寔公高祖也會大父宗善遊退陶門以孝謹稱大父安節進士當昏朝廢母痛哭杜門不出學者稱洛崖先生祀于花巖書院父昌後丙丁後廢舉自修外祖生員李炯公幼而明敏八歲讀小

學曰爲人之道正在是矣又往往解說綱目書法人
奇之未冠丁外艱哀毀如成人痛父早歿事母至孝
及艱持喪一從文公家禮哀有餘而禮無不足吊者
莫不悅處鄉黨宗族主忠信和睦倡起多士爲尤庵
宋文正辨誣卽蔡公河徵戊午疏是已時嶺俗淪於
黨習甚至斥節義詆道學公與士友設講學明義理
使得以正其趨向早謝公車安貧守分築堂脩竹之
中扁曰竹堂每春秋佳節相羊於溪山之間樂以忘
憂又從申百源碩蕃遊授心經近思錄俯讀仰思以
躬行實踐爲務晚年愛儉湖之勝就而居之其鄉子

弟服事謹公性謙挹雖不居師道然而從學者衆頗
有誘掖之效以甲戌十一月八日卒距其生乙亥七
月二十日適六十年葬于尙州鳳陽里枕丙之原公
卒後三年士林欲以公配青巖祠公嗣子胤輝力挽
而止之蓋體公志也公娶平山申氏正郎煜女有男
女各二長卽胤輝次鎰輝女適南圖翰南峙衡長房
男致扈弘福致鳳次房男弘九致權胤輝致扈皆以
孝名其往倅青巖之論固異乎世俗所謂孝者而是
真愛其親也宜其有是父有是子也達俊漢俊復俊
聖俊其曾孫濟明濟剛濟貞濟恭濟甲濟寬濟憲濟

仁皆玄孫餘不能盡記濟明之子益幹以其族叔濟
默所爲行錄袖示余請以狀德之文按其錄有曰世
皆以修飾爲尙而公則真率焉世皆以阿好爲容而
公則持正焉世皆以聞達爲高而公則晦遜焉是以
有其學而無其命噫公之高標真襟可以卽此而想
像况又有李尙書敏輔表阡之文闡發無餘憾采復
何贅焉第序次如右以竢立言之君子

縣監李公行狀

公諱挺河字聖應李出碧珍以將軍蔥言爲鼻祖歷
幾世有諱約東官知中樞號老樹諡平靖史錄清白

與金估畢曹梅溪并享景濂書院生諱紹元生諱有
蕃生諱碩明生諱喜善代有簪纓生諱尙伋官兵曹
參知累 贈至吏曹判書尤菴宋文正撰碑文許以
直節重一世是卽公高祖曾祖諱墳右承旨遇事果
敢不顧利害尤庵抵書曰銀山鐵壁自是兄家計祖
諱志達有經術號丹崖當辛丑士禍嘗爲文誅尹公
志述被謫而歸與遂庵文巖二公爲道義交國典學
徒登科者五例陞資以繕工監副正拜僉知中樞及
卒陶菴文正公以詩挽之有貞松寒後方知勁良玉
灰中自不焚之句考諱世璠通德郎早卒妣尹氏

贈別檢世煥女公以 肅廟癸巳正月四日生於槐山笑梅洞是日丹崖公在京第夢龍登天已而聞公生喜之小名曰龍佑教以義方期以遠到未嘗須臾離方吊祭尹公之日語公曰吾以大義祭亡友死生惟天與汝居能幾時乎及編配嶺外公卽隨往時年九歲經史諸書無不耳提口授公亦聰明絕人文過百行三四讀能誦丹崖公愛之甚闕課或誦有脫誤必楚以懲之作字筆管少敲則亦峻責之其教導之嚴可知已是以公於丹崖公恩兼父師嘗有終身慕及祭必獻賢對子弟說童時受誨未嘗不感涕於書

無不涉獵而中庸則讀至千遍音義訓釋皆就鳳巖蔡公學大有得力及癸亥大比問湯與尹相學公獨出見以爲皆本生知無相學果發解會圍問中庸所求者四何不及夫婦舉儒皆鶻突而公獨言夫婦不可曰所求乎婦以事夫未能也得考官旨以三中入格讀書之力蓋不可誣也於詞律不甚用力而語多警發丹巖閔文忠公嘗遊巴串水石士友數百人咸集公和其詩多士爲之閣筆丁卯雷淵南公有容以國子長坐明倫堂要居齋儒生和韻公拈筆卽占曰鬢堂秋日闢書帷槐市蟬聲警懶疲尾曰農老遺風

今復見一時齊播兩公詩南公讚不容口癸未拜
章陵參奉巡山禁松恪勤奉職携子姪姻戚讀書或
作文每以暇時逍遙於松杉蒼蔚之逕彷彿仕隱之
趣丙戌遷義禁府都事與同僚和而不狎丁亥移內
侍教官訓課有程嘗入侍誦大學序反覆奏對 上
顧侍臣曰實才也明暢不易得戊子陞掌樂院主簿
或有改正樂譜議公曰國初制作已便守之既久紛
更無益也已丑出爲安峽縣監勤幹恬約以勸農講
學爲務親出郊勞農具饁資以興起之減民戶之捧
薄山田之斂鰥寡孤獨最無依者蠲給還耗官隸之

公行往來者皆計日給糧私故則不役也修葺倉廩
六十餘架募民以役物力皆自官辦春秋釋菜必親
享揭三綱五倫之目以示生徒講大學以勸儒業處
官如家一毫無濫奉大夫夫人親侍嘗殮所夕怡悅親
戚率爲團聚屏屐常錯於戶外而待之歡然雖對功
曹吏屬劇談諧笑不施表襍鄉戶中俊茂者許補儒
任於吏輩亦取品性之疎暢者任之加厚黜其恃才
佼尸者人多感服有吏請免役以刻木爲吏期不對
命題而試之卽許頃給吏輩傳爲美談凡民訴牒一
無留滯居官五年大治處處立碑至有楊州境上所

暨畿伯見之歎曰揚州亦有安峽碑乎癸巳遭內艱歸大小攀轅流涕其營窆也官屬應役不怠歲久尙有去思云公自少留意堪輿常爲親營求吉地至是卜兔山浮鴨山下蔭洞之原旣葬移通德公墓合封焉爲置祭田祭器托縣吏春秋行祭承旨公墓丹崖公墓各在二處而雖老不廢展省凡奉先之節不以支派而自疎每值考妣諱日不脫衣帶坐以達曙以致如在之誠祀需預爲具辦未嘗窘急嘗慮諸族貧甚無以行祭祀捐俸餘與諸宗設稷名曰永慕取其殖助之凶年或代償宗中逋租所賴者甚衆與弟挺

洛友愛甚處官處鄉未嘗不同居湛樂撫愛姪子栴普姊子申容盡心訓誨賙其窮乏教從孫勉以敦行孝悌將冠於孫首命之曰吾家世學文正取其字字以英仲可乎嘗患世俗尙扮飾少誠慤務爲坦質居家接人不設畦町蕩蕩無齷以謙卑自牧處鄉黨交際輒懽然無失而人有不可面折不阿常自恥爲言行兩截平生所講不離四書自爲類編以便考覽又手書巴溪問答抄聖學輯要審諦而孰翫之嘗乘舟遇風一行無人色而公獨手傘凝坐晏然不動其有得於先輩嘉言善行多矣丁未沉疾對子弟申申言

奉先保家之道諸族有來問疾者勉與嗣子共紹先
誼竟以九月三十日卒某月某日葬彈琴臺下癸坐
之原實公自卜也配山東蔡氏祔其左進士以休女
冲諒慈祥深有內助一男一女男東普進士女適尹
心龜庶子根普東普一男景烈二女長適朴志淵進
士一未笄尹三女一男長適申相魯餘并幼公氣宇
寬簡局量洪放制事規物脫畧古人而恢恢有餘地
奉先竭力居官盡職經綸出類方便過人具甘澹奉
祭祀資用無大乏遠近稱之余知州事四年往往聞
士友之言如此恨不及公在時得與之讀法而謀政

也公嗣子仍與余遊一日袖示其所爲行錄謹撰次
如右以塞其請後有立言者作庶幾採擇焉

縣監馬公行狀

公諱應房字精叔自號龍菴馬氏出長興始祖諱赫
仁在麗朝判開城府事入本朝諱天牧佐我 太宗
判中樞府事封長興府院君 贈諡忠靖是生胖是
生仲信兩世皆縣監是公高祖以上曾祖祖若考諱
麟全諱承昌判官諱希禎習讀外祖光山金俊一此
先系也公凡再娶竹山安氏邗旭女東萊鄭氏翊女
一男光門二女判決事李邊虞侯韓南節孫建 贈

院正生河瑞 贈參議生漢億 贈參判今謁余狀
者幾世孫麟祥此其後承也公世居康津其邑誌曰
前縣監馬某天性至孝文章華瞻蔭仕爲興德縣監
以清白善治又爲鎮安縣監而後當島夷之變殉節
于南原之戰只以衣履復葬大抵勤王之義敵愾之
誠蓄於中發於外率家僮聚糗糧卽有詩曰馘賊男
兒事盟心撫大弓偷生寧有意天日照丹衷倭賊將
陷南原乃謂本道兵使李福男光陽縣監李春元曰
當亂六歲勢窮力盡生不報國死可爲厲被甲奮劍
突入賊陣斬首數級而來福男等曰如公老益壯矣

俄而又入賊中中丸而卒乃丁酉八月十六日此又
公宦蹟忠節也嗚呼今距公之世已數百有餘年也
家乘散佚子姓零替賴邑之有誌董董傳乎一鄉之
耳目者如此若公華瞻之文清白之治殆不知其何
如也此已可惜况南原之戰一時死義之人類皆見
知於當世而獨公忠節如彼其卓犖尙湮滅無聞也
豈不重可惜哉如二李諸公死固職也公不過白首
書生耳無官守之責與避亂士女逃竄山谷間偷生
保命亦何不可之有乃能奮不顧身義不忍苟免必
欲以一死報國觀於爲厲之言盟心之句可知其意

氣激烈老而益壯自平日讀書中辦出來而非一時
慷慨殺身者之比也嗚呼偉哉只此一節在公已多
矣人之知不知庸何加損焉然而其不至全泯者亦
天也公之亡家人以衣冠葬于本縣列樹面鷹峙良
坐之原二淑人合祔距其生甲申八月八日得年七
十四云立言者作庶幾有以採擇也否

縣監洪公行狀

公豐山大姓始諱樂綏後改義綏履之其字也高麗
國學直學諱之慶爲鼻祖是生都僉議舍人諱侃以
文章直節號洪崖先生曰侑曰演兩世大提學歷五

世有諱履祥大司憲 贈領議政諡文敬是世所稱
慕堂以經術德行爲 宣廟朝名臣洪氏於是益大
顯又二世有諱柱元尙貞明公主封永安尉諡文懿
爲士流所推重生諱萬容禮曹判書諡貞簡於公爲
高祖曾祖諱重福同知敦寧祖諱鏡輔右副承旨考
諱文浩鴻山縣監妣慶州金氏府使 贈判書漢禎
之女領議政靖獻公興慶之孫公以 英宗丙寅十
月一日生穎悟絕人不喜戲自七八歲能屬文聰明
強記不煩教課人以才童稱及冠應泮試選高等自
是聲名炙人口每出遊場屋操筆立書無艱難色雖

其成敗有命升沉有時而蓋其夙就如此幸已 王
世孫入學以執事周旋中禮時年十六觀者亦咨歎
焉乙未得庠解中丁酉進士時國榮以近族顯朝權
諷以一第公謝曰科宦命也乙巳丁外艱服闋有勸
之仕者公曰自我而求之所不爲也庚戌始拜 穆
陵參奉壬子序陞司宰奉事有貢人夤緣掖屬多橫
濫公不撓權貴之言而竟治之癸丑換 景慕宮奉
事當小大享必澡其身以至灑掃陳設洗滌裁割無
不監省 上曰未有如洪某者九月陞尙衣直長命
還授本職仍用履歷 上嘗患本宮右麓爲潦雨所

汰欲命地部改植階礎先使公相之公曰此不必外
煩地部役旬餘自可堅緻遂承 命董督不多日工
訖 上又擬宮苑粧翠屏判度支沈公頤之問於公
公曰費不過四五十金 上聞之喜曰是必別有神
術仍 命掌之公乃克如其言 上甚嘉之凡提舉
有所白必曰洪某知否嘗入侍 闕宮教曰汝之剛
嚴已於宰監聞之陞六品仍付 本宮令飭銓曹無
得移他司一日於後苑賜午饌曰予於宮官視汝尤
別仍問老母安否特賜米歸遺三月周覽宮苑指點
翠屏及右麓補築處曰此人局於一第不得展布其

才惜也仍曰予欲設蔭科政須若等空老者也冬公患大腫累月沉劇適當親裸上命勿遽以他官代宮司臨筵數問病勢仍賜米炭諭僚官元在明勉以善調病必參歲初慶禮是歲乙卯卽莊獻先世子惠慶宮周甲慶辰而上將親上徽號及期果力疾參班二月上奉慈宮幸顯隆園公以內賓陪從上教曰本宮享祀儀式樂器祭器圖與祝并書于屏以備朝夕常日欲詳則煩欲簡則疎惟汝可能之公遂蚤夜繕寫未及訖六月拜宜寧縣監亦上旨也特命留待十八日誕辰入侍于延禧堂

上問將母期又曰宜民得賢太守予可無憂左右莫不榮之及赴任以孝友睦婣正名分尚儉約毋犯罪過毋趨末利列條分目榜諭一境嘗曰受國恩任芻牧之責如有利於民者顧何惜肌膚每未曙而坐衙孜孜爲治事無巨細必躬執剖決不委吏手非甚病必整衣冠莅事曰待民不可不敬洞開重門使民直入白事各輸其情其有愚蒙者必溫言曉解事至沛然斷決案無停牘門無滯訟雖機務叢沓而殆無愧於古人所謂耳聽目閱口酬手判者爬搔弊垢類不爲目前計邑有積逋民多流亡公別施方畧不撓

一民而充之田政多紊乃執簿查括奸猾莫售軍伍有關乃覈漏填簽黃白悉免坊置訓長聚生徒課業捐廩建學四時各有習月課武士工拙論其賞罰修戎器措置軍馬節度使閱武歎曰孰謂書生不閑兵務如傳關穀陞戶資裝亦捐俸而補之歲一會境內耆老行養老宴歲末又饋米肉嘗夢得每飯不忘祝聖主臨財或恐忝先人之句書揭壁上朝夕警省官俸外一切却之曰剝民之膏血忍爲奉祭養親之資耶如隱結加耗亦曰名色不正非所當取也始欲悉報上營卽又曰近名矣遂以治公廨之毀圯者漕倉

捧稅亦有應納而特蠲除之律已清嚴雖一芥不義則不取間因 上旨馳詣京卒寫享儀圖屏以進上諭以精密特命陞敘仍問居官爲治之方 天顏歡笑先是 上於華城行宮奉壽 慈宮以餘財散置諸道視糶糶例留作救荒資名曰整理穀公始之官別建庫儲之爲文諭民間咸使知粒粒 聖恩不施一箠穀皆精實巡使承朝令按查列邑獨宜寧規畫纖悉無絲毫怨 上賜表裏以嘉之戊午歲大饑民死且盡公以至公爲福行私必殃八字刻圖章自矢忘寢食竭力調賑道有飢者感焉如傷民感其誠

如赤子之仰哺病者蘇流者還隣民如歸按使以書
賀曰近聞宜民每飯必頌侯之德然後始飯云何以
得此於至愚而神者繡衣上其治 上曰已知其循
良矣嘗兼任晉州民有黨於盜者公戒之曰汝有父
母何不力穡就養以盡人子之職乃析楊桎梏不堪
其苦使父母晝夜焦泣其不孝孰大焉遂釋而遣之
居歲餘有父母來謝曰小人有子蒙諭改行力穡養
父母惟我侯之恩其至誠感人類如此窮交貧族皆
實心欵遇有過期未婚葬者亦隨力經紀俾各無憾
是以居官五載臧獲無所增人謂清白固高人而猶

恐人知者尤可敬也已未遭內艱邑民聚哭曰失我
賢侯旣去儒武吏民謀豎石思之公囑新蒞者禁之
庚申 正宗昇遐公哀慟如喪考語及 先朝必涕
沾襟癸亥爲訓局郎乙丑 貞純王后薨敦匠 山
陵旣竣事陞叙然當滂暑之酷盡瘁積傷病遂作矣
一日語諸子曰夜夢侍 先王天語諄諄至教以召
汝官矣吾且休矣竟以其閏六月患腫二十六日卒
得年董六十公凡再娶星州李氏參奉克顯之女性
行溫順甚有婦道生於甲子二月二十八日卒於戊
子十二月四日無育先葬于交河青巖面石橋里坐

壬之原以八月六日穿其右而合封焉昌寧曹氏縣
監霍之女有四男二女男善謨憲謨彥謨皆上庠遠
謨女金弘根一未笄憲謨未葬不勝喪以沒其妻尹
氏亦不食下從長房四男稷周翼周宅周德周一女
及三房一女并幼公自幼善事大父母父母左右承
奉捷於影響爲承旨公倩書鮮有不當意者其侍母
夫人疾躬自扶護醫云蛇膏良公必先嘗以進在南
邑克盡志物之養推以至姑姊妹貧則爲之賙救病
則爲之療治於先祀必誠必敬與人交委曲款洽絕
無圭角或間以善謔遇文士則論詩對武人則談兵

下至醫卜農商各隨其所處而應之故雖臭味不同
者咸得其歡出而使吏隸入而御僮僕不煩不撓人
莫不愛戴愛子女甚教之必有方嘗戒之曰驕且奢
未有不敗亡者衣掩體已矣食不飢足矣守吾之分
全吾之性恭慎自持勿言人長短時政得失則庶乎
寡過又曰止謗莫如無辨保身莫如自修財色也科
宦也好名也貪生也此數者人欲之大者尤宜猛省
而遏絕之常以儉約存心窓壁黷垢而不易新紙几
案朽鈍而必以舊物曰是先人手澤也其平居不扮
飾衣冠自同流俗欲然若無能者而觀於威儀外則

坦率論其資性中實慈諒至於做事則詳明纖密機
警練達殆無不中窾爲文不甚究索筆翰如飛尤長
於吏文嫻於典故往往有人所難及處嗚呼以公才
諳文華何施不宜而蹭蹬不第薄試嶺邑顧不能大
有所展豈非命歟雖然公有衆子孫皆足以克家其
二房以孝烈聞雖死亦有光公之教本諸身而著于
家者於是益驗矣不羸于躬而遺諸後其不在公乎
采同敦公自出也公少余一歲故呼余以叔然余則
以友也自蔥竹之遊鉛槧之會以至老白首相得蓋
歡如也世之知公非不深未有深於余者宜孝子之

屬以善狀也遂就其敘述文字詮次如右凡其一言
一行輒不敢殺其繁爲不如是無以得其人也立言
者有以擇焉則幸云爾

附錄墓表

府君諱采字季亮號華泉今 上乙丑以篤學實行
特贈議政府左贊成諡文敬諡法博聞多見日文夙
夜儆戒曰敬李氏牛峯人自高麗侍中三州伯諱公
靖始見於譜入我朝有諱吉培觀察使代有簪組至
晚悔堂諱有謙以儒術顯 仁祖初徵遺逸直拜縣
宰官至戶曹參議生諱翮右議政爲 肅廟蓋臣諡
忠憲號逸休生諱晚昌進士 贈吏曹判書生諱緝
左參贊文正公陶菴先生蒙不祧 典是爲府君祖
考考曰大司諫諱濟遠 贈吏曹判書妣曰 贈貞

華身集 卷一
夫人豐山洪氏同敦寧重福女永安都尉柱元曾孫也府君以英宗乙丑正月二十三日生于寒泉丙舍豐額大耳睂秀而眼炯文正公甚奇之期以遠大八歲大諫公見背十九丁貞夫人憂茹荼泣血發憤力學文辭驟進甲午進士翼年入仕徽寧殿參奉內贍寺奉事差假注書蔭之選也司圍署別提漢城府司僕寺主簿司憲府監察平市署令刑戶曹佐郎戶自辟也陞正郎敦寧府主簿弘陵長陵令惠局郎廣興守翊衛司衛率陞司禦屢侍胄筵講孟子數陳明暢附以箴戒正廟每設屏而臨聽語筵

臣曰李采讀書之力真不可誣也乙丑以貞純大妃回甲推恩陞通政階五衛將敦寧都正僉知中樞左副承旨後屢拜序至右工曹參議甲戌年七十以侍從臣父陞嘉善戶曹參判同義禁副摠管漢城左右尹同知中樞外則永柔縣令陰竹知禮縣監善山豐川府使忠州黃州驪州牧使慶州府尹而尙州羅州除拜不赴知禮時選文學之士爲講長立校宮講規每公服莅聽以勸之邑治濱大川歲患汎溢乃募丁築長堤居者始安堵立石名之曰李公堤歲饑大賑民得全活御史以治最一道聞上下教褒嘉

命擢授本道三品職單付爲善山府使旣赴任益殫
心圖報暇日行養老宴鄉飲酒禮旌孝烈聞忠州時
舉廢墜戢豪猾績庸茂著黃州時又大興文教庶變
質俗慶州時通信使之行其費爲民巨斲辦穀七百
石名曰支信租依糶糶取耗爲久遠圖庚辰十月十
三日考終于正寢享年七十六朝家吊賻如式所帶
院長之諸院儒皆爲文致侑引塗所過士林多迎哭
者葬于忠州簇子洞負壬之原與夫人墓合封焉府
君姿粹而性仁氣剛而志高平日言行循蹈文正公
規度寒泉卽晚悔公以下四代墳山而文正公講學

之所也嘗卜築其洞外爲衡泌之樂治園池蒔花養
魚置茅亭扁曰成趣中歲解官還鄉勵志問學日沉
潛性理之書孳孳如不及惕然發歎曰數十年出沒
聲利場中不識我家有正大門路幾誤此生矣嘗手
書以爲己立心以當仁爲事根基則小學規模則大
學楷梯則近思錄諸子經書及明健弘毅四字闕一
不可以成德之語揭之座右自勉而勉人曰此吾皇
祖爲學旨訣也於禮學尤精詣純正立論之際嚴於
隄防而又參之以時宜無不可行者晚年與俞著菴
漢雋吳贊善熙常洪祭酒直弼往復講劇爲道義契

華身集 卷一
府君以早孤爲終身痛語及輒泫臉以晬日在大諫
公諱辰前三日未嘗進酒饌逮周甲亦不許子女上
壽或在外不與祭則必設位展哀文正公書院 賜
額寒泉而規畫制度躬自董役造成遺集五十編亦
殫精梳洗以活字印行窮交貧族另加存恤於世好
姻誼有喪必致誄而觀葬周急人喪葬亦多焉平居
早起謁廟退則竦身危坐几案箱篋位置有序雖盛
暑必整飭衣冠冠必有纓以制欹斜至易簪時猶手
自正冠素尚儉約器用取其完固服御取其適體而
已教子姪雅言不離於義方御家衆嚴而仁恕兼行

與人交疊疊輸悃悃和而不流或有過失當面諷刺
其仕也非公事平生不一跡公卿門見世之埋沒名
利知進而不知反者爲之代慚歷官內外惟直道而
行有不見孚輒引疾而歸雖處田廬憂國愛 君之
心惓惓不忘其爲邑則以澤民造士爲準政無不舉
雖簿牒煩委而寓目便記耳聽口應剖決若流公暇
猶不廢看讀古書爲文章本之經術辭達而理順典
雅精鍊自得其體如士友之經禮質疑者雖聯篇屢
牘看詳理會下筆卽付答至於斯文是非關係義理
處立言明白莅事剛果截然有不可奪者栗谷全書

卽文正公手定而其重刊也府君實倡始而摠裁時
有援尤菴宋子例欲改編目爲李子者府君慎重而
不許士論黷之夫人 贈貞敬夫人楊州趙氏吏曹
參判榮順女右議政忠翼公泰采曾孫端淑貞靜壺
德純備先府君二十二年而終壽五十三子長光
文吏曹判書文簡公追 贈左贊成次光正改名輝
正系仲氏後吏曹判書文貞公三女黃基瓚進士
贈吏參朴齊賢金炳珪側出子光始光世女金芸淳
縣令光文五子壻蔭司僕正塈爲伯氏嗣孫進士
贈吏議坡井天埉判書壻今牧使三女韓正教判書

洪用周郡守金寅根縣令光正四子墩翰林墩蔭承
旨坡府使 贈吏判諡忠愍墩參判三女尹致定判
書宋正熙蔭參議金英秀承旨側出女趙秉儉府使
朴鳴夏郡守光始系子境學官黃男鍾羽鍾林同敦
寧鍾奭同敦寧鍾奎蔭參判女尹泰周 贈吏參朴
男敬陽獻陽正郎女尹命求參奉金早坳無育壻系
子鎬善今郡守側出子鎬百鎬善子觀用進士塈系
子鎬秉 贈吏參鎬秉系子世用大司成坡系子鎬
圭埉子鎬善出後鎬性今縣監壻子鎬翼今參議鎬
翼子泰用墩子鎬永墩子鎬命進士鎬命系子漢用

書身集 卷一六
啟子鎬頤今縣監墩系子鎬瓚墓下有文貞公所置
碑石方擬顯刻遺事謹依文簡公所撰家狀撮其大
要無容更述焉

孫崇政大夫原任吏曹判書兼判義禁府事弘文館
提學同知成均館事 世子左賓客 奎章閣直提
學埉謹識

曾孫通政大夫吏曹參議侍講院兼輔德 奎章閣
檢校直閣鎬翼謹書

崇禎五庚辰三月 日

墓左埋燔誌

右我王考文敬公遺集也公以德行經術矜式當
世世稱爲陶菴先生肖孫此是長老相傳之語也
年前校定此集規欲鋟梓而事力有所拘掣遂至
遷就及子鎬翼爲忠州牧聚俸錢求活字始克印
出以卒先父兄志事誠不勝愴幸之至 崇禎五
丙戌孟冬孫埉謹書

